

西
夏
書
事

西夏書事卷三十二

青浦 吳廣成西齋

崇寧三年

遼乾統四年

夏貞觀四年春二月廢統軍仁多

保忠以兵攻渭延慶三州

左廂卓羅監軍司地在黃河北統軍仁多保忠素

黠桀駐兵剏子山總領西南部族與邈川首領温

溪心鄰境相善元祐中邊臣令温溪心委曲勸諭

許除節度使令保守舊土自爲一蕃以梁乙逋猜

忌不敢動乙逋死保忠曾遣使至熙河請內附不

果曾布日錄云元符初環慶將李忠傑出兵襲劉子山欲擒仁多保忠不獲獲其牛羊族帳甚衆時尙書左僕射蔡京使熙河帥王厚招之厚言保忠雖有歸意下無附者章數上京責厚益急乃遣其弟赴保忠所計事還爲邏者所獲乾順追保忠赴牙帳京猶欲招致厚言保忠不能復領軍政使得之一匹夫耳何益于事京不聽潛使人以金帛誘之乾順怒聲言假兵于遼點精兵數千騎出入渭延慶三州間抄掠民畜大肆慢辭

按

夏自元昊僭號世世窺邊罪之者不去桀黠

卽曰凶頑蓋尊中國賤蠻夷春秋法也迨乾順
請和歲時入貢朝廷因其慕義正當示以懷柔
况其國中建學養賢不復尙武此正德綏之會
禮致之秋也夫何欲建邊功潛施計誘使其君
臣疑貳復啟兵端謀國不臧誰之咎與

夏五月遣兵爭石堡城不克

初鄜延將景思立曲珍攻拔磨崖葭蘆浮圖諸砦
知延州沈括議築城不果及陝西轉運使陶節夫
知延州議築州北之石堡砦石堡以天澗爲險可

進者惟一路宋初嘗置城至道後廢之遂爲夏有
害粟其間以千數城旣成乾順憤曰漢家奪吾金
窟塙亟發鐵騎爭之節夫部分將士擊敗夏兵統
軍以下被殺者數十百人

六月戰于靈州川復敗遣使求援于遼

河南四十五州夏國十有其四東路由清遠距羅
山訖靈武不及百里特以五監軍統焉而韋州又
恃靈武爲右臂鍾傳欲斷其要害遣將折可適領
銳騎出蕭關薄靈州川夏兵猝不備大敗蕃民扶

老挾稚中夜入州城被俘者甚夥

宋史郭浩傳徽宗時爲環慶將

嘗率百騎抵靈州城下夏兵千人追

之浩手斬二人以首還與可適傳異

乾順乃遣李

造福田若水至遼求援

冬十月遣使請和不得掠鎮戎軍

中國用蔡京計令西邊招致夏人毋論首從賞同
斬級陶節夫在延安大加招誘西民放牧近邊者
輒脇以兵不從則殺之乾順異詞請和節夫拒之
不得達乾順怒合四監軍衆突入涇原圍平夏城
殺鈐轄楊忠攻鎮戎軍掠數萬口而返

宋史夏國傳三年夏

人攻鎮戎掠數萬口執鄜州知州高永年而去
去攷永年被殺在四年攻宣威城時傳誤

按節夫大加招誘輒殺放牧夏不之怨從而請
和可謂有禮矣乃拒不以聞致邊民塗炭曲豈
在夏與

附宋史李南公傳知延安府夏人攻涇原南公
出兵搗其虛夏兵乃退攷夏國傳當夏人犯涇

原時國中不聞有受兵事

崇寧四年遼乾統五年夏貞觀五年春正月復乞援于遼

遼爲之請罷兵

乾順復遣李造福等如遼求援且乞伐宋遼主出兵千餘屯塞上遣樞密直學士高端禮入貢以姻婭爲言請罷伐夏兵

二月月入東井

犯距星未幾犯水位

監軍駙馬兀朮率師援銀川砦戰于蒿平嶺敗歿遂失銀州

初徐禧等于永樂小川築新城距故銀州二十五里前據銀州大川賜名銀川砦及永樂陷銀川亦

沒至是官軍圍之城中固守裨將韓世忠斬關殺
守城將擲首陴外諸軍乘之砦遂潰兀朮以重兵
赴援次蒿平嶺與世忠戰不勝而走俄出間道爭
之復敗死于陣銀州守將皆棄城走

三月熒惑犯東井

留井距入鉞

以兵納西蕃溪賧羅撒攻宣威城不克

洮西安撫使王厚再定鄯湟吐蕃種落散亂溪賧
羅撒與多羅巴走投夏國乾順謀納之合四監軍

兵數萬攻宣威城

卽吐蕃麓牛城
崇寧初改名

知鄯州高永年

出援行三十里逢羌帳下親兵數百迎之皆永年
昔所推納熟戶信之不設備羌遽執之多羅巴謂
其下曰此人奪吾國使吾宗族漂落無處所殺之
探其心肝食焉徽宗令援兵深入急分其勢無令
專向東方熙河鈐轄趙隆至鐵山先登陷陣士卒
殊死戰夏兵聞之遂解圍

按

春秋書納不應納者也茲書者子夏也喞氏

有大功于宋瞎征攏抄輩爲王厚所逼舉土出

降宋之負西蕃甚矣溪賒羅撒乃唃氏裔多羅
巴奉之襲據青唐亦自復故地非與中國爭也
自童貫再復湟鄯種落摧殘乾順以姻好之故
爲之出攻宣威非興滅之義乎

遼以宗女來歸

遼主封宗女南仙爲成安公主歸于乾順

宋史夏國傳在

崇寧三年茲從
遼史天祚紀

按

前義成興平書公主矣茲書宗女見成安之

賢不以公主重也不以公主重則非義成興平

所可並稱者故異文書之

掠塞門砦

乾順以陶節夫城銀州遣兵爭之謀告夏衆已東
節夫曰必西趨涇原也遣裨將耿端彥率兵疾馳
至銀州護之五日城成夏兵從涇原至見備禦已
固由杏子河東山入延州塞門砦大掠五日還

遣兵爭蕭關敗環慶將折可適于踏口

蕭關善水草便屯聚爲夏國左臂地有舊城址鍾
傳議城之遣可適將兵護役遇雨失道至踏口夏

兵乘之可適敗走

夏四月攻臨宗砦不克

臨宗屬湟州圍之數重伏兵乳酪河西邀截中國
援兵知州辛叔憲遣部將李寧將兵出戰先以鐵
騎蹂伏處縱兵奮擊遂敗

按宋自蔡京專政童貫擅兵開邊生事非西蕃

卽西夏耳西蕃衰亂勢不復支西夏恃其兵力
連次入擾然俱不書寇以曲在中國不得專罪

夏也

五月攻順寧砦及北蕃市城又敗

陶節夫既城石堡銀州上言洪宥諸州已在顧盼中橫山之地十有七八興州巢穴淺露直可計取因陳取興靈之策蔡京令西邊儲粟以待乾順聞之先以兵攻順寧砦鄜延第二副將劉延慶奮擊乃退轉攻湟州北蕃市城又爲辛叔憲所敗

六月遣使如遼謝

因賜婚也且貢方物

冬十二月復使乞援于遼遼使入請侵地

四庫全書 卷二十一
乾順復遣李造福田若水趣遼赴救遼使樞密副使蕭良入朝言朝廷出兵侵夏今大遼以帝妹嫁夏國主請早退兵還所侵地徽宗遣翰林學士林攄報使

崇寧五年

遼乾統六年

夏貞觀六年春正月彗星見

出西方其長竟天

二月遼復爲求侵地

初林攄報聘蔡京密使激怒遼國以絕其請攄盛氣入境迓者小不如儀輒詬辨及見遼主始跪授

書卽抗言夏人有罪北朝不能加責而反爲之請
耶遼君臣不知所對及還遼主使捕附奏求還夏
國城砦據語復不遜遼主怒逐之遣知北院樞密
使蕭得里底南院樞密使牛溫舒以使人失禮入
告仍請還元符講和以後所侵夏地徽宗許還崇
寧以來侵地若先帝已定疆畫不得復議也

遼史
牛溫

舒傳溫舒與蕭得里底使宋方大宴優人爲道士
裝索土泥藥爐優曰土少不能和溫舒遽起以手
藉土懷之宋主問其故對曰臣奉命來和若不
從則當捲土收去宋人大驚遂許夏和

按

遼之于夏世爲婚姻嘗爲之乞和請地求退

兵無足異者而宋自紹聖中章榘戍平夏拓砮
五十餘所又經陶節夫日肆進築夏之削弱甚
矣于此而扶其衰排其難恤鄰之誼誰曰不宜
况受林據之侮絕不與中國較遼之此舉事出
至公故疊書子之

夏六月遣使如遼謝

中國既許夏和廢銀州爲銀川城罷五路經制使
徒陶節夫知洪州乾順遣李造福如遼謝解和之
德

冬十月遣使入謝

自延慶之役兵連者三年至是始修職貢自後歲時通使邊境少安

大觀元年

遼乾統七年

夏貞觀七年秋八月遣使入貢

會中國大宴饗故制外國使預宴者夏使于西廊南赴坐交使以次歇空進奉押衙次交州契丹舍利從人則于東廊南赴坐大中祥符四年升交州于朶殿夏州押衙于東廊南頭歇空坐七年又升龜茲使副于西廊南坐自後遂爲定制是時于闐

龜茲涪州夷入貢夏使坐三使上成禮而還

大觀二年

遼乾統八年

夏貞觀八年夏四月世子仁愛生

世子成安公主所生乾順遣使告于遼

按

子生不盡書茲書仁愛何仁愛爲遼公主所

生異時痛遼國之亡憤悒而卒是可誌也

六月以兵戍葢龍境

中國既復洮州復攻溪哥城西蕃王子臧征撲哥
降建積石軍距葢龍境不及百里乾順恐被侵掠
以兵五千戍之

秋九月移牒定邊軍請罷築堡

定邊軍向距甜井背多移嶺界堠十餘里嘗築觀
化通化二堡扼通所嶺通祖嶺諸隘至是又于勒
崖原築神堂堡去卓望處僅三里乾順移牒請罷
役不報

冬十月使賀天寧節

中國盡收西蕃地徽宗下詔曲赦熙河蘭湟秦鳳
永興軍路兵民歡悅使人由熙河入一路迎者咸
加禮

大觀三年

遼乾統九年

夏貞觀九年春二月遣焦彥堅至

涇原定疆界不果

自紹聖後西邊疆議不定乾順屢以爲言時遣彥堅入涇原請畫界至知懷德軍种師道留與議彥堅必欲得故地師道曰如言故地當以漢唐爲正則君家疆土益蹙矣彥堅無以對

夏四月遣使如遼

使人焦彥堅歸乾順與羣臣謀曰身膺宗社之重不能復先朝故土恥也然朱恃兵威非仗北朝之

力勢且不能因使人告于遼請遣信使諭宋

冬十月遣使入貢

使人與闍婆占城使同入見

大觀四年

遼乾統十年

夏貞觀十年春正月入貢方物

乾順請遼諭宋遼主不許復使入獻方物冀得要
請押伴左司員外郎范坦應對有節使不敢爭

三月遣使貢于遼

仍以李造福充供奉使造福于是五使遼矣

秋九月瓜沙肅三州飢

瓜沙諸州素鮮耕稼專以畜牧爲生自三月不雨
至于是月水草乏絕赤地數百里牛羊無所食蕃
民流亡者甚衆監軍司以聞乾順命發靈夏諸州
粟賑之

冬十月太白晝見

羣臣咸謂主兵喪請修省不報

政和元年

遼大慶元年

夏貞觀十一年夏六月遣使貢于

遼

遼主清暑散水原將出獵使人見于行在命從行

秋八月夏州大水

大風雨河水暴漲漢源渠溢陷長隄入城壞軍營
五所倉庫民舍千餘區

冬十二月遣使入貢

夏國入貢正旦聖節居多元豐末神宗詔夏使見
辭儀永依嘉祐八年爲例至是中國重立儀制使

人遂遵新儀廷見

宋史禮志政和新儀夏使見日
俟見班絕謝班前使奉表函引

入殿庭副使同入西向立舍人揖躬舍人當殿躬
奏夏國進奉使姓名以下祗候見引當殿前跪進
表函舍人受之副入內侍省官進呈使者起歸位
四拜起居舍人宣有敕賜某物兼賜酒饌跪授箱

過悅伏興再拜舍人曰各祇候揖西出次從人入
不奏卽引當殿四拜起居舍人宣賜分物兼賜酒
食跪授箱過悅伏興再拜舍人曰各祇候揖西出
辭日引使副入殿庭西向立舍人揖躬舍人當殿
躬奏夏國進奉使姓名以下祇候辭引
當殿四拜宣賜某物酒饌再拜如見儀

政和二年遼大慶二年夏貞觀十二年春二月命選人以

資格進

凡宗族世家議功議親俱加蕃漢一等工文學者
尤以不次擢

夏六月朔白虹貫日

乾順命諸臣直言得失御史大夫謀寧克任疏言

治法之要不外兵刑富國之方無非食貨國家自
青白兩鹽不通互市膏腴諸壤寔就式徵兵行無
百日之糧倉儲無三年之蓄而惟恃西北一區與
契丹交易有無豈所以裕國計乎自用兵延慶以
來點集則害農時爭鬪則傷民力星辰示異水旱
告災山界數州非侵卽削近邊列堡有戰無耕于
是滿目瘡痍日呼庚癸豈所以安民命乎且吾朝
立國西陲射獵爲務今國中養賢重學兵政日弛
昔人云虛美薰心秦亂之萌又云浮名妨要晉衰

之兆臣願主上既隆文治尤修武備毋徒慕好士之虛名而忘禦邊之實務也乾順善之不能用

按

夏自貞觀以後賁受以剝之象也宋以闕宦主兵猶能制之若後無金人之禍得如中興諸將宣力西陲夏國之亡不待智者決矣克任之言殆有見于此歟

冬十月使賀天寧節

宋制蕃使同日見辭先夏國次高麗次交阯次海外諸蠻所以優夏也時新置知客省引進四方館

東西上閣門事等官使者朝辭蔡京等故作矜嚴
以示降抑使回乾順不說

政和三年

遼大慶三年

夏貞觀十三年春三月遣使入貢

中國以天賜元圭冊告永裕永泰二陵大享羣臣
夏使至燕資過優以誇其盛

夏六月使貢于遼

遼主好遊獵夏使入國遼主尙在混同江不得見
旣聞清暑南崖仍朝于行在

冬十月降羌李訛哆誘襲定遠軍統軍梁哆陵出兵

應之

元符中西蕃首領李訛哆內降授環州定遠蕃族
大首領子遇昌爲環慶守將訛哆陰窖粟數十萬
遺書哆唛曰我居漢二十年每見春廩旣虛秋庾
未積糧草轉輸例給空券方春未秋士有飢色若
捲甲而趨徑擣定遠唾手可取定遠旣得則旁十
餘城不攻自下我積穀累年掘地藏之所在皆是
大兵之來斗糧無賫可坐而飽也陝西轉運使任
諒廉知其謀募人盡發窖粟分輸定邊諸城堡及

哆陵圍定遠失所藏而還越七日訛哆以所部萬餘騎歸夏

十二月寇觀化堡不克

自來夏國大舉未嘗過二十日是時乾順用李訛哆爲將以數萬衆入定邊軍圍觀化堡力攻二十五日不克乃退

政和四年

遼大慶四年

夏雍寧元年春三月築藏底河城

保安軍之北界上有汭流曰藏底河乾順遣兵據山築城爲進取計徽宗命宦官童貫爲陝西河東

河西經畧使討之

夏五月進兵據天都峒拒鄜延將劉延慶兵于藏底河卻之

天都自元符中爲中國所取築峒其上乾順旣城藏底遣衆復之延慶率兵攻圍城守嚴不能破裨將韓世忠夜登城斬二級割護城堊以還夏兵從佛口嶺赴援世忠力戰過藏底河夏兵追及之世忠不勝而退

冬十月城洪夏軍爲知西安州种師道所破

乾順遣兵深入過定邊軍築城佛口谷名洪夏軍童貫使种師道率兵攻之城四旁絕少水源軍士渴甚師道指西山麓曰是當有水命工鑿之果得城上人驚以爲神軍中氣沮遂爲所破

政和五年

遼大慶五年

夏雍寧二年春正月卻秦鳳兵于

清水河復與熙河兵戰古骨龍敗績

清水河北界與卓囉監軍地相對童貫謀取之遣熙河經畧使劉法將步騎十五萬出湟州秦鳳經畧使劉仲武將兵五萬出會州貫以中軍駐蘭州

爲兩路聲援仲武由麻累山西至清水河夏兵拒之不得進築城置守還劉法直抵古骨龍夏右廂兵數萬迎戰大敗被殺三千餘人

夏四月復以兵爭葦葦城不克

乾順每于中國進築之始必遣兵力爭至于三四不能得方已時种師道督諸道兵城葦葦平初賦土夏兵大至壁葫蘆河以待師道暉于河澗若將決戰者陰遣偏將曲充由間道出橫嶺揚言援軍至夏兵方駭顧折可世潛軍軍其後姚平仲復以

精甲擊其前夏兵大潰

秋八月敗涇原等四路官兵于藏底河城

童貫令劉仲武王厚合涇原鄜延環慶秦鳳之兵
攻藏底河城乾順遣兵擊之官軍大敗死者十四
五秦鳳第三將軍萬人皆沒

九月至蕭關大掠

乾順乘藏底河城之勝縱兵突入蕭關掠蕃漢人
畜無數至葫蘆河不得渡而返

冬十月遣使入貢

乾順遣使言熙河涇原諸路用兵不已請詔止之
蔡京等不許

西夏書事卷三十三

青浦 吳廣成西齋 纂

政和六年

遼大慶六年

夏雍寧三年春二月仁多泉城降

子熙河將劉法法屠之

童貫使劉法合熙秦之師攻仁多泉城守將遣使請救乾順命晉王察哥將兵援之察哥聞法名不敢進城中孤守月餘力竭出降法受而屠之死者三千餘人

按 殺降兵家所忌屠之虐更甚矣異時統安之

敗法不得其死宜哉

秋七月李訛哆被獲伏誅

訛哆在夏國漸用事與子遇昌常引兵入寇至是入邊偵事爲熙河邏卒所獲徽宗詔誅之函其首于甲庫

冬十一月破靖夏城屠之

自紹聖崇寧節次進築夏南境地僅存五六千里居民皆散處沙漠山谷間涇原又築葦葦平爲靖夏城形勢更蹙乾順大舉兵攻之時久無雪先使

數萬騎繞城踐塵漲天潛穿濠爲地道入城城陷
盡屠之以報仁多泉之役 周禮曰屠者暴之也
劉法屠仁多泉城夏人屠靖夏城遞相報復無時
休息率土地以食人肉其禍慘矣其罪甚矣然非
夏之跋扈實宋之自取也耳

攻石尖山兵潰

先是种師道築安平砦乾順遣重兵據砦水源渭
州都監郭浩率精騎數百奪之兵退轉攻石尖山
浩復冒陣而前流矢中左脇不拔奮力大呼諸軍

從之夏兵不能禦遂潰

十二月遣使入貢

時中國以熙河進築功成進執政等官使副廷見
並加詰責怏怏而回

政和七年

遼大慶七年

夏雍寧四年春二月种師道帥師

克藏底河城

師道率陝西七路兵共十萬征藏底河城期以旬
日必克旣薄城下城中守備固攻之不破至八日
師道斬不用命者安邊巡檢楊震率壯士先登斬

級數百衆乘而上守城卒驚潰遂克之

宋史地理志政和三

年賈炎乞進築藏底河城不果六年知慶州姚古克之卽威德軍與种師道傳異

按

藏底河城小而堅夏人恃以爲固師道八日

克之功亦偉矣然亦見地利之不足恃也負險者可以鑒矣

夏四月卹延將劉延慶破成德軍大首領賞屈被執西蕃王子益麻黨征內降

童貫又使延慶襲破成德軍捨賞屈黨征等遂舉

衆降

宋史鄭襲傳大觀中羌人假黨征名歸附童貫奏賜姓名趙懷恭官團練使至是黨征自

西寧求歸貫權事洩議者希貫意幾欲絕之云

重和元年

遼大慶八年

夏雍寧五年春二月圍震武軍

震武卽古骨龍城童貫進築賜名地在山峽中熙秦兩路不能餉自築城後夏國數以兵爭殺知軍事李明時熙河涇原環慶同日地震民心慌亂乾順遣兵從善治堡入圍之知軍孟明出關被創危甚熙河將劉法率兵赴援圍乃解

夏四月入丁星原大掠

丁星原在乳酪河西距湟州綏遠關四十里初劉

法解震武圍于瞻令古城北連築德通石門兩城
堡乾順畏逼遣兵入丁星原圍之見禦備固旁掠
六日而還徽宗詔再築靖夏伏羌制戎等城爲備
史臣曰雍熙元年復以銀夏綏宥四州授李繼
捧自後四州之地不復領職方熙寧始務關土而
种諤先取綏州韓絳繼取銀州最後李憲取蘭州
沈括復取葭蘆米脂安疆浮圖等砦迨元祐更張
仍以葭蘆四砦給賜夏人而分畫久不能定紹聖
遂罷前議督諸軍乘勢進討自三年秋迄元符二

年冬凡陝西河東建州一軍二關三城九砦二十八堡十崇寧政和間陶節夫鍾傳之徒又建仁多泉靖夏等城雖夏人寢衰而中國之民力亦重困矣

六月築割牛城廓州防禦使何灌襲之城不守

乾順見中國進築不已于訖六嶺分界處築割牛城屯重兵守之爲東南捍蔽童貫使灌由膚公城夜出兵襲據之貫以聞賜名統安

宣和元年

遼大慶九年

夏元德元年春三月敗熙河經畧

使劉法軍于統安城殺之復圍震武

統安深入夏境童貫得之謂可制夏人死命乃遣
劉法進取朔方法不欲行貫強之曰君在京師親
受命于帝自言必成功今難之何也法不得已引
兵二萬至統安乾順令晉王察哥率步騎萬餘爲
三陣以當法前軍別遣精騎登山出其後大戰移
七時法兵饑馬渴死者甚衆前軍楊惟忠後軍焦
安節左軍朱定國等皆敗法乘夜遁比明走七十
里至蓋朱峴守兵追之墜崖折足一負擔軍斬之

察哥見法首惻然語其下曰劉將軍前敗我于古
骨龍仁多泉吾嘗避其鋒謂天生神將豈料今爲
一小卒梟首哉其失在恃勝輕出不可不戒遂陷
統安進圍震武震武頻受兵熙秦兩路疲于奔命
蕃漢苦之至是將陷察哥曰勿破此城留作南朝

病塊遂引還

宋史徽宗紀五月丙辰敗夏人于震武劉韜傳劉法死夏人圍震武韜攝

鄭延帥出奇兵搗之解其圍夏國傳夏人乘勝圍震武劉仲武何灌等赴之乃解去三說互異

史臣曰是役死者十萬貫隱其敗以捷聞宣撫使
以下受解圍賞者數百人不知夏人實自去也諸

路所築城砦皆不毛夏所不爭之地而關輔爲之
蕭條果如察哥之言

夏四月戰于蕭關敗績遂棄永和等三城

震武圍旣解童貫始命种師道劉仲武劉延慶將
兵出蕭關夏兵拒之不勝遂破永和砦圍割沓城

城中兵出戰又敗逐北至鳴沙夏兵已棄城走師

道等無所見而回

宋史徽宗紀夏四月庚寅童貫以鄜延環慶兵大破夏人平其

三城不詳城爲何名貫傳及夏國傳不載其事茲從王氏東都事畧

五月復圍震武軍不克

西夏書卷之三十一
察哥因童貫兵進鳴沙復至震武日夜百道攻之
城中危甚會貫兵還救乃退

六月以遼國書請和于鄜延

初乾順恃茶山鹽鐵之利及橫山諸族帳勁勇善
戰用以抗中國自童貫領六路軍事督諸將進築
軍壘立堡砦盡得山界部州已失所恃及永和震
武之敗疆地日蹙兵勢亦衰遂以遼國書致鄜延
帥劉韜請納款謝罪衆疑爲詐韜曰兵興累年中
國尙不支况小邦乎彼方新敗其衆甚疲懼我再

舉故款附以圖自安耳密疏以聞徽宗詔許之已
乾順故愆期久之方使人再請韜戒之曰朝廷方
事征討吾爲汝請命毋若異時邀歲幣軼邊疆以
取威怒使臣懼聽命

秋八月遣使上誓表棄所與誓詔而還

自夏國納款陝西六路兵皆罷乾順遣人進誓表
時童貫已入爲太傅以誓詔授使者使辭不取貫
迫館伴強與之使持還及境仍棄之于道

冬十月遣使入賀天寧節

先夏使所乘誓詔鄜延帥賈炎得而上之童貫大慚忿將請兵合討會賀節使入乃止

按

西夏賀節使自是正史不書

宣和二年

遼大慶十年

夏元德二年春三月日承氣立妃

曹氏

曹氏曩霄時把關太尉曹勉孫也年十四入宮性溫柔貞靜動以禮法常侍仁安公主主素嚴肅氏身承起居順適其意因勸乾順納之始命爲才人至是進位賢妃

冬十一月封宗室子仁忠爲濮王仁禮爲舒王

仁忠父景思嘗從秉常于木峇當河津阻絕罔訛
萌等潛使窺伺欲施鳩毒景思左右抗護以計脫
者再秉常德之已復位欲加顯擢爲梁氏父子阻
抑不遂志死時仁忠二人尙幼及長俱通蕃漢字
有才思善歌咏始任秘書監繼擢仁忠禮部郎中
仁禮河南轉運使至是二人自陳先世功乃晉爵
宣和三年遼保大元年金太祖夏元德三年遣使約遼
兵入寇祖旻天輔五年

北方女真部完顏氏世居混同江之東南接高麗
北鄰室韋西界渤海鐵甸東瀕海在夷狄最微建
隆中嘗獻馬自天聖後役屬于遼不復入貢傳至
阿骨打政和中始叛遼取寧江州遂稱帝建國號
金更名旻中國遣馬政趙良嗣等浮海使金約攻
遼國以復燕雲乾順聞之遣使如遼約先舉兵入
寇遼主不許

宣和四年

遼保大二年
金天輔六年

夏元德四年春三月遣兵援

遼西京不及

金將斜也幹离不等破遼西京追遼主于乙室部
不獲西京復拒守乾順遣兵五千爲援甫出境聞
金將謀良虎已破西京師遂還

夏四月金降將耶律坦犯境以兵備河西

坦奉金將斜也命將兵脅降遼西南招討使所屬
諸部直至夏境聲勢甚盛乾順遣兵備河西諸郡
坦解去

五月遣大將李良輔救遼破金兵于天德軍

遼山西城邑諸部盡降于金乾順聞遼主走保陰

山遣良輔將兵三萬救之次天德境金都統婁室
遣將突撻補擯以騎二百爲候良輔擊之殆盡知
金兵將大至設伏以待未幾金將阿土罕以數百
騎來攻伏發殲之阿土罕棄馬越山得脫 張時
泰曰當時遼金之敵審矣夏人何以救爲哉曰
彼但知救災恤鄰之義強弱非所論也嗚呼觀夫
夏人此舉則其磊落光明固非宋之助叛攻鄰者
比也

按

拓跋起自西陲其戰爭攻取散見史冊鮮有

以救書者惟石晉時李彝興兵掠契丹以牽制其侵晉之師綱目書之曰救夫是時晉力未衰尙可無藉于救而已特書子之若遼國爲宋金交攻高麗坐視部族離心勢窮援絕獨乾順毅然出師星馳赴難較之彝興殆有進焉後日宜水之敗乃天不祚遼耳豈戰之罪耶

六月進軍宜水與金將幹魯婁室兩軍戰敗績

良輔旣勝金軍時久雨謂金兵怯恃衆不備已聞婁室出陵野嶺留將拔高速扼險來拒遂縱兵渡

宜水爲方陣前突婁室分軍爲二迭出迭入轉戰三十里將近宜水金都統幹魯軍又至從旁合擊良輔大敗死者數千人退走野谷渡澗水水暴至漂沒不可勝計

趙良嗣燕雲奉使錄夏人援遼爲暴漲所溺在八月大金國志同宋

遼二史係在六月

秋七月遣使問遼主起居

遼主旣失西京及沙漠以南遂由訛莎烈走石輦驛金將蒲家奴追敗之遼主悉棄輜重走乾順遣大臣曹价奔問起居饋以糧糗

宣和五年

遼保大三年金天輔七年八月後太宗晟天會元年

夏元德五年春

正月復發兵救遼次可敦館不得進

乾順奉遼主命遣兵屯于可敦館相爲聲援金將婁室以兵戍朔州築城霸德山阻之不得進

按

夏與金兵勢懸殊乾順不畏宜水之敗復出

師爲遼聲援霸德山之阻乃力之不足非心不誠也書復發兵書不得進皆原其心而恕之

夏五月遣使迎遼主于雲中

金都統幹魯遣幹离不銀朮可等襲遼主于陰山

諸王妃女悉被擄遼主僞使乞降而西走雲內乾
順知車駕瀕河遣使往迎請臨其國

金人來誘叛遼六月遼使冊爲夏國皇帝因徵兵不
應

先是韓離不追遼主至天德遣使諭夏國許割地
議和以沮救遼之心遼主左右頗有知其事者及
遼主謀奔河西中軍都統蕭特烈同知檢點司事
耶律懷義等諫不聽渡河次于金肅軍北金候人
吳十回等偵言夏國已迎護遼主渡大河矣韓離

不又遺乾順書曰奉詔有云夏王遼之所出不渝
終始危難相救今茲已舉遼國若能如事遼之舊
以效職貢當聽其來若遼主至彼可令執送割地
酬勛倘有疑貳恐生後悔書至會遼主遣使冊乾
順爲夏國皇帝命益發兵來衛乾順不應

按匹夫不可奪志矧一國之主哉當乾順救遼

之時間起居請臨幸苟守此志不渝金源雖狡
焉得致之乃始懼兵威繼貪土地漸易初心頓
忘舊好雖金人實誘之而乾順之爲德不終亦

無所辭罪矣

宣和六年

遼保大四年
金天會二年

夏元德六年春正月奉表稱

藩于金金賜以遼西北地

乾順既與遼異遣御史中丞芭里公亮奉表金主
請以事遼之禮事金因受賜地金都統粘沒喝承
割割下塞以北陰山以南乙室耶刺部吐渌灤西
之地與之灤西本拓跋地向爲遼侵取者也

按

此夏國臣金之始既稱藩復得地其叛遼益

著矣

三月上誓表于金

乾順得金賜地復遣芭里公亮獻方物上誓表曰
臣乾順言今月十五日西南北兩路都統遣左諫
議大夫王介儒等賚牒奉宣若夏國追悔前罪捕
送遼主立盟上表仍依遼國舊制及賜誓詔將來
或有不虞交相救援者臣與遼國世通姻契名係
藩臣輒爲援以啟端曾犯威而結衅旣速違天之
咎果罹敗績之憂蒙降德音以寬前罪仍賜土地
用廣藩籬載惟含垢之恩常切戴天之望自今以

後凡于歲時朝賀貢進表章使人往復等事一切
永依臣事遼國舊例其契丹昏主今不在境至如
奔竄到此不復存泊卽當執獻若大朝知其所在
以兵追捕無敢爲地及依前援助其或徵兵卽當
依應至如殊方異域朝覲天闕合經當國道路亦
不阻節以上所敘數事臣誓固此誠傳嗣不變苟
或有渝天地監察神明殛之及子孫不克享國

閏三月金使來賜誓詔更遼禮以受

金主遣王阿海楊天吉賜誓詔曰維天會二年歲

次甲辰閏三月戊寅朔皇帝賜誓詔于夏國主乾
順先皇帝誕膺寶籙肇啟皇圖而卿國據夏臺境
連遼右以效力于昏主致結衅于王師先皇以爲
忠于所事務施恩而釋過迨眇躬之纂紹仰遺訓
以遵行卿乃深念前非樂從內附飭使輶而奉貢
效臣節以稱藩載錫龍光用彰復好所有割賜土
地使聘禮節相爲援助等事一切恭依先朝制詔
其依應徵兵所請宜允三辰在上朕豈食言苟或
變渝亦如卿誓垂遠戒諭毋替厥誠故事遼使至

國以臣禮見乾順欲依舊禮阿海不肯曰遼與夏甥舅也故夏主坐受使者之禮今大金與夏國君臣也見大國使者當如儀爭數日不決乾順乃起立受焉自後見金使皆如之

按更遼禮受醜乾順也乾順再表奉金請以事遼爲例至是竟以臣禮見其屈已不已甚哉

秋七月以兵侵武朔二州

武朔遼山後地金取武州歸宋朔州守將韓正亦舉城內附中國築固疆等堡爲守乾順數以兵攻

之宜撫使譚稹遣部將李嗣本督兵出戰相持數日不解

九月子仁孝生

仁孝曹妃所出生時異光滿室成安公主見而愛之請名仁孝令保母持至宮中時撫摩不忍釋冬十月謝金誓詔且以宋侵賜地告

乾順遣使奉表至金謝賜誓詔并訴所受新割地爲宋人侵畧求援金主詔曰省所上表具悉已命西南北兩路都統府從宜定奪

使賀金天清節

天清節金主晟誕也夏使次于宋使高麗使後賜宴亦如之

按此西夏賀金節之始

十一月金人索遼戶口歸之

初乾順乘遼之敝侵掠沿邊戶口貨孥及受金割地曾約非其境內者願還所掠久之不歸金主詔副都統幹魯曰夏人數以宋侵賜地求吾援兵或不欲盡歸戶口沮吾追遼主事也今後在夏戶口

其盡索無遺乾順知不可止乃悉歸之

十二月遣使入貢

按西夏入貢使自是正史不書

宣和七年

遼保大五年金天會三年是歲遼亡

夏元德七年春正月始

賀金正旦

乾順表畧云斗柄建寅當帝歷更新之旦葭灰飛
管屬皇圖正始之辰四序推先一人履慶恭惟化
流中外德被邇遐方熙律之載陽應令候而布惠
克疑神于突窳務行政于要荒四表無虞羣黎至

治爰鳳闕屆春之早協龍廷展賀之初百辟稱觴
用盡輸誠之意萬邦薦祉克堅獻歲之心臣無任
云云大使武功郎沒細好副使宣德郎季膺等奉
表以聞

按

此西夏賀金正旦之始

二月遣使如金奠慰并賀卽位

金太祖葬于和陵乾順奉表致奠并賀太宗卽位
時藩使館見儀未有定制使至逾月殿中少監劉
筈始詳定焉

秋八月金兵來侵

遼主延禧被獲都統林牙耶律大石率所部西走
金諸帥訛傳乾順約大石取山西諸郡因縱兵入
境掠取人畜乾順遺書婁室責之都統完顏希尹
以聞金主命嚴備之

按

夏之事金未有失禮乃前索戶口茲肆侵掠
是夏之臣金非求福直求禍矣雖然貪一時之
利棄百年之好結虎狼之鄰基他日之禍中國
且然于夏何責哉

九月世子仁愛卒

仁愛幼聰穎長多材藝初金兵破遼遼主西走卽
慟哭請兵赴援宜水之敗咄嗟者累月及乾順臣
金泣諫不聽悒鬱而卒

按

仁愛因遼亡飲恨不肯臣金憤恚而卒可謂
能知大義者乾順何心有愧于其子多矣

遼成安公主卒

公主傷遼亡又痛世子不食卒

按

不書后某氏而曰遼公主著其心乎遼也心

乎遼故小鞠鞞書遼將耶律大石書遼臣后書
遼公主皆所以予義也

冬十月使賀金天清節

時金人潛分兩路伐宋軍務旁午夏使與宋使俱
不得見就館賜燕而還

附

金史宗翰傳太宗欲罷陝西兵諸將不可曰
陝西與西夏爲鄰兵不可罷宗翰曰初與夏約
攻宋陝西夏人不應今宜先事陝西畧定五路
旣弱西夏然後取宋攻太宗伐宋在天會三年

約夏夾攻本紀不載

十二月遣使入賀正旦

乾順聞欽宗卽位遣使表賀且覘虛實

按

西夏賀正使自是正史不書

西夏書事卷三十三終